



Broj: 01,02,03,04/3-05-2-1783/25

Sarajevo, 17. 12. 2025.



BOSNA I HERCEGOVINA
PARLAMENTARNA SKUPŠTINA BOSNE I HERCEGOVINE
SARAJEVO

PRIMLJENO:		25-12-2025	
Organizaciona jedinica	Klasifikaciona oznaka	Redni broj	Broj priloga

IZVJEŠTAJ

s 23. jesenjeg zasjedanja Parlamentarne skupštine OSCE-a Istanbul, Republika Turska, 17 - 19. novembar 2025.

Albin Muslić, prvi zamjenik predsjedavajućeg Delegacije Parlamentarne skupštine Bosne i Hercegovine u Parlamentarnoj skupštini Organizacije za evropsku sigurnost i saradnju (PSOSCE) i poslanik u Predstavničkom domu Parlamentarne skupštine BiH, učestvovala je na 23. jesenjem zasjedanju PSOSCE-a, održanom 17 - 19. novembra 2025. u Istanbulu, Republika Turska.

Ovogodišnje zasjedanje okupilo je gotovo 200 parlamentaraca iz 53 zemlje uz Parlamentarnu konferenciju o revitalizaciji multilateralizma kroz dijalog i saradnju kojom je obilježeno 50 godina Završnog akta iz Helsinkija kao njegov centralni događaj. Delegacija Parlamentarne skupštine BiH, osim na samoj konferenciji, učestvovala je i na sjednici Stalnog komiteta.

Prvi dan započeo je sjednicom Stalnog komiteta na kojoj su razmatrani izvještaji predsjednika PSOSCE-a Perea Joana Ponsa, šefa finansija Johana Busera i generalnog sekretara Roberta Montelle te se Komitet u izvještajima osvrnuo na prethodne međunarodne posmatračke misije izbornih procesa i nedavne događaje te poslovnici obavezne sastanke u predstojećem periodu.

U svojim izvještajima predsjednik Pons se dotaknuo značajnijih aktivnosti od preuzimanja mandata i plana njegovog predsjedavanja. Potcrtao je važnost pitanja Ukrajine i kako ono ostaje centralna tema unutar Parlamentarne skupštine Organizacije, a što se ogleda i u pridruživanju Međunarodnoj koaliciji za povratak ukrajinske djece kako bi se okončale nezakonite otmice i deportacije ukrajinske djece te im se omogućio povratak kući. Posebno je istaknuo nedavnu terensku posjetu rukovodstva PSOSCE-a Bosni i Hercegovini, okarakteriziravši je kao veoma informativnu i kroz koju je još jednom ukazano na važnost neposredne saradnje, ali i preuzimanje odgovornosti za napredak od strane unutrašnjih političkih faktora te najavio i podržao međunarodnu posmatračku misiju Organizacije na Općim izborima 2026. u Bosni i Hercegovini.

Osim predsjednika Ponsa, Parlamentarnu konferenciju pozdravnim govorima otvorili su predsjedavajući turske delegacije u PSOSCE-u Selami Altinok, generalni sekretar OSCE-a Feridun Sinirlioglu i predsjednik Velike narodne skupštine Turske Numan Kurtulmus. Govornici su posebno pozvali na što hitnije i konačno okončanje ratnog izraelsko-palestinskog sukoba, uz jasno uvažavanje takvih poziva i drugih međunarodnih faktora, a u svrhu zaštite nevinih civila. Pons i Sinirlioglu podsjetili su na važnost međunarodne organizacije kao što je upravo Organizacija za sigurnost i saradnju u Evropi, njenu inkluzivnost i iskustvo kroz koje sigurno može još jednom pokazati kako su dijalog i saradnja neophodni upravo u najtežim vremenima, a što je prilika i obaveza za hrabro i odgovorno djelovanje. Naglašeno je, također, kako svi pregovori koji se tiču mira u Ukrajini moraju uključivati „službeni Kijev“ te ukazano na pozitivne sigurnosne iskorake u vidu normalizacije odnosa Armenije i Azerbejdžana.

Pod moderiranjem počasne predsjednice i specijalne predstavnice za medijaciju i posmatranje izbora Pije Kaume, održana je prva sesija konferencije u pogledu jačanja dijaloga, medijacije i povjerenja u eri nesigurnosti. Uvodna izlaganja imali su: viši savjetnik predsjednika Republike Turske Cagri Erhan, predsjednica Evropskog instituta za mir Helga Maria Schmid i izvršni direktor Centra za humanitarni dijalog David Harland. U okviru spomenute sesije posebno su se učesnici dotaknuli turskih inicijativa, Medijacije za mir te one za žitarice Crnog mora, diplomatskih napora u Somaliji, na Bliskom istoku i području Balkana, uključujući poticanje trilateralne saradnje između Bosne i Hercegovine, Republike Hrvatske i Republike Srbije. Također, ponovo je istaknuta važnost multilateralnih organizacija, očuvanja povjerenja i mogućnosti iznalaženja dogovora u jeku sukoba širom svijeta u, kako je okarakterizirano, eri diplomatije novog vremena.

Drugi i završni dan konferencije otvoren je sesijom o temi globalne trgovine zasnovane na pravilima pod vodstvom potpredsjednice PSOSCE-a Gudrun Kugler uz učesnike: Mustafu Yazgana, rektora Univerziteta Istanbul Bilgi, Johna Drummonda, šefa Odjela za trgovinsku politiku Organizacije za ekonomsku saradnju i razvoj, Bakyt Dzhusupova, koordinatora OSCE-ovih ekonomskih i ekoloških aktivnosti, i Azaya Guliyeva, predsjednika Komiteta za ekonomske poslove, nauku, tehnologiju i okoliš PSOSCE-a. Sigurnost je mnogo više od odsustva rata, a OSCE kao organizacija je mnogo doprinijela tome u prošlosti, naglasili su govornici, što potvrđuje i trodimenzionalnost same organizacije, uz ekonomiju kao važnu i jednu od njih. Sve izraženija konkurencija na polju strateških resursa i novih tehnologija potkopava temelje otvorene trgovine zasnovane na pravilima, rekao je Guliyev. Govornici su, također, pozvali na revitalizaciju multilateralizma i parlamentarce na promoviranje strateške povezanosti kroz infrastrukturu i energetske koridore kako bi se osigurala pokretačka snaga trgovine u pogledu sigurnosti i održivog razvoja.


Treća sesija koju je predvodio potpredsjednik PSOSCE-a Luis Graca prioritizirala je pitanje ljudskog dostojanstva, zaštite života, prava te podršku porodica i zajednica, upravo one teme koja podsjeća parlamentarce zašto se prvenstveno okupljaju na ovakvim događajima, potcrtao je Graca. Potpredsjednik je još jednom istaknuo podršku i pozvao na

oslobađanje tri pritvorena službenika OSCE-a, što su snažno podržali i prisutni članovi PSOSCE-a. Panelisti Sara Muscroft iz Ureda UN-a za koordiniranje humanitarnih pitanja, Paolo Marchi, UNICEF-ov predstavnik u Turskoj, i prof. Sebnem Akcapara s Univerziteta u Ankari naglasili su kolektivno djelovanje kao okosnicu rješavanja globalnih problema koji za prvu posljedicu imaju ugrožavanje (kvaliteta) ljudskih života te vrednovanje međunarodnog humanitarnog prava kao nulti prioritet za uspostavljanje ravnoteže u ovom pogledu.

Konferencija je zatvorena zaključnim obraćanjima predsjednika PSOSCE-a Perea Ponsa i generalnog sekretara Roberta Montelle te šefa turske delegacije u Parlamentarnoj skupštini Organizacije Selamija Altinoka, a koji su naglasili historijsku ulogu Turske na diplomatskom polju, potrebu za oživljavanjem duha saradnje koji je i doveo do stvaranja Organizacije za sigurnost i saradnju u Evropi 1975. godine te istaknuli nužnost nastavka međuparlamentarnog dijaloga upravo u ovako izazovnim vremenima kada on nema alternativu. Predsjednik Pons je ponovo potcrtao podršku Ukrajini kao glavni tekući izazov s kojim se Organizacija suočava. Ključno je da Parlamentarna skupština ostane ujedinjena i predana pomaganju Ukrajini i zajedničkom radu na rješavanju naših izazova, zaključio je Pons.

Pripremio:

Sekretar Delegacije
PSBiH u PSOSCE-u

Teo Rogić


Odobrio:

Prvi zamjenik predsjedavajućeg
Delegacije PSBiH u PSOSCE-u

Albin Muslić



DOSTAVITI:

- Kolegiju Doma naroda Parlamentarne skupštine BiH
- Kolegiju Predstavničkog doma Parlamentarne skupštine BiH
- Kolegiju Sekretarijata Parlamentarne skupštine BiH
- članovima Delegacije PSBiH u PSOSCE-u
- Komisiji za vanjske poslove Predstavničkog doma
- Komisiji za vanjsku i trgovinsku politiku, carine, saobraćaj i komunikacije Doma naroda
- Sektoru za odnose s javnošću
- a/a